



Broj: 06-1-07-1-100/23
Sarajevo, 23.03.2023. godine
F.S.

Na osnovu člana 2.9 stav (1) tačka 17, i člana 10.16 stav (3) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22) i Kriterija i postupka popune nedostajućih mandata u Domu naroda Parlamenta Federacije Bosne i Hercegovine ("Službeni glasnik BiH", broj 75/22), u pravnoj stvari dodjele mandata delegata u Domu naroda Parlamenta Federacije Bosne i Hercegovine, Centralna izborna komisija Bosne i Hercegovine je na 29. sjednici, održanoj dana 23.03.2023. godine, donijela

O D L U K U

o dodjeli mandata

(1) **Lukić Saši**, kandidatu sa liste političkog subjekta SDA - STRANKA DEMOKRATSKE AKCIJE, za Skupštinu Kantona Sarajevo, za Opće izbore 2022. godine, dodjeljuje se mandat delegata u Domu naroda Parlamenta Federacije Bosne i Hercegovine, iz reda srpskog naroda.

O b r a z l o ž e n j e

Centralna izborna komisija BiH je na 28. sjednici, održanoj dana 14.03.2023. godine, donijela odluku, broj: 06-1-07-1-100/23, kojom je Stojanović Igoru utvrđen prestanak mandata delegata iz reda srpskog naroda u Domu naroda Parlamenta Federacije BiH, a na temelju zahtjeva podnositelja.

Uvidom u službenu evidenciju Centralne izborne komisije BiH, utvrđeno je da ni na jednoj ovjerenoj kandidatskoj listi iz skupština svih deset kantona za izbor delegata u Dom naroda Parlamenta Federacije Bosne i Hercegovine nema neizabrani kandidat iz reda srpskog naroda, a kako bi nedostajući mandat u Domu naroda Parlamenta Federacije BiH bio popunjen.

Članom 10.16 stav (3) Izbornog zakona BiH, propisano je: „Izuzetno, Centralna izborna komisija Bosne i Hercegovine će donijeti poseban akt kojim će propisati način popune mjesta dodijeljenih jednom od konstitutivnih naroda ili grupi Ostalih koja ostanu upražnjena nakon provođenja postupka predviđenog u stavovima (1) i (2) ovog člana i popunit će nedostajući broj delegata iz reda konstitutivnog naroda ili iz reda Ostalih.“

Slijedom navedenog, Centralna izborna komisija Bosne i Hercegovine je, na 82. sjednici održanoj 04.11.2022. godine, donijela odluku o Kriterijima i postupku popune nedostajućih mandata u Domu naroda Parlamenta Federacije Bosne i Hercegovine (u daljnjem tekstu „Kriteriji“).

Članom 2. Kriterija propisano je da za popunu nedostajućeg delegata iz reda konstitutivnog naroda ili iz reda ostalih u Dom naroda Parlamenta Federacije Bosne i Hercegovine, Centralna izborna komisija Bosne i Hercegovine utvrđuje i primjenjuje sljedeće kriterije:

- a) broj stanovnika iz reda nedostajućeg konstitutivnog naroda ili iz reda ostalih po kantonima uzimajući u obzir apsolutni i procentualni broj stanovnika u odnosu na ukupan broj stanovnika,
- b) kvalifikovanost političkih subjekata (prijeden cenzus i osvojen najmanje jedan mandat u skupštini kantona), a koji ima kandidata na kandidatskim listama iz reda nedostajućeg konstitutivnog naroda ili iz reda ostalih i
- c) broj osvojenih ličnih glasova kandidata sa liste političkog subjekta iz tačke b) ovog člana.

Imajući u vidu to da je prethodno prestao mandat delegata u Domu naroda Parlamenta Federacije Bosne i Hercegovine koji je izabran iz Skupštine Kantona Sarajevo, primjenom tačke b) i tačke c) Kriterija, te uvidom u Odluku o protvrđivanju rezultata Općih izbora 2022. godine u Bosni i Hercegovini („Službeni glasnik BiH“, broj 73/22), utvrđeno je da sedam političkih subjekata u Skupštini Kantona Sarajevo imaju osvojen najmanje jedan mandat, kako slijedi:

R.B.	Šifra	Naziv političkog subjekta	Broj osvojenih mandata
1	90	SDA - STRANKA DEMOKRATSKE AKCIJE	7
2	2317	NAROD I PRAVDA	7
3	8	SDP - SOCIJALDEMOKRATSKA PARTIJA BOSNE I HERCEGOVINE	6
4	4	STRANKA ZA BOSNU I HERCEGOVINU-SBIH	5
5	877	NAŠA STRANKA	5
6	3068	ŽELJKO KOMŠIĆ - ZA GRAĐANSKU DRŽAVU - DF/GS	4
7	3056	ZA NOVE GENERACIJE	1

Nadalje, uvidom u broj osvojenih ličnih glasova kandidata za Skupštinu Kantona Sarajevo iz reda srpskog naroda, u Odluci o protvrđivanju rezultata Općih izbora 2022. godine u Bosni i Hercegovini, Centralna izborna komisija Bosne i Hercegovine je utvrdila da je Lukić Saša, kandidat iz reda srpskog naroda sa kandidatske liste političkog subjekta SDA - STRANKA DEMOKRATSKE AKCIJE, za Skupštinu Kantona Sarajevo, za Opće izbore 2022. godine, osvojio najveći broj ličnih glasova (1709 glasova), od svih kandidata koji nisu dobili mandat u Domu naroda Parlamenta Federacije Bosne i Hercegovine.

Slijedom navedenog, daljnjom primjenom odredbi člana 3. stav (2) i (3) Kriterija, određeno je da se popuna delagata u Domu naroda Parlamenta Federacije Bosne i Hercegovine vrši kandidatima sa kandidatskih listi političkih subjekata koji su osvojili mandat u skupštini kantona iz stava (1) ovog člana, koji ima kandidata na kandidatskim listama iz reda nedostajućeg konstitutivnog naroda ili iz reda ostalih, te da se delegatsko mjesto dodjeljuje kandidatu iz reda nedostajućeg konstitutivnog naroda ili iz reda ostalih koji je osvojio najveći broj ličnih glasova u tom kantonu iz političkog subjekta koji je osvojio najmanje jedan mandat u skupštini kantona.

U skladu sa svim navedenim, Centralna izborna komisija Bosne i Hercegovine je, na osnovu člana 2.9 stav (1) tačka 17, i člana 10.16 stav (3) Izbornog zakona Bosne i Hercegovine i Kriterija i postupka popune nedostajućih mandata u Domu naroda Parlamenta Federacije Bosne i Hercegovine, odlučila kao u dispozitivu ove Odluke.

Pravna pouka: Protiv ove odluke dozvoljena je žalba. Žalba se podnosi Apelacionom odjelu Suda Bosne i Hercegovine u roku od dva dana od dana prijema ove odluke preko Centralne izborne komisije Bosne i Hercegovine, u skladu sa članom 6.9 stav (1) i stav (2) Izbornog zakona Bosne i Hercegovine.

Zamjenjuje predsjednika
Dr. Ahmet Šantić, član



Dostavljeno:

- Lukić Saša,
- Dom naroda Parlamenta Federacije BiH, nakon pravomoćnosti,
- a/a.